

第六十七屆香港浸會大學劇社
第二十六屆大專戲劇節匯演

《駅》

第三稿

編劇：朱珈瑩

監製：曾泳霖

導演：鄧嘉欣

副導演：麥子聰

劇作簡介

踏入二十世紀的高能市流傳著以結果定義好壞的風氣，以殘酷的考試制度定奪居民在此地的去留。三個少年因一本從天而降的秘笈無意展開一場與這個世界的對抗。有人樂於其中，有人終可釋放真我，有人渴望生活回到原來的軌跡。

列車已經緩緩開出，你會是享受沿途風物詩，還是渴望到站觀賞日不落的一員呢？

故事大綱

踏入 20 世紀的香城廣泛流傳著一種信仰：結果論。這種風氣在要求人人完美的高能市尤為盛行。這裡的少年到了 16 歲要考一場定生死的公開試，及格者留下，不及格則驅逐出境。三位生於這城市的少年在一天夜裡為幫好友在教員室拿回物品時，一本名為《6uo 修煉手冊》的秘笈從天而降。迫於公開試燃眉在即的壓力，三人決定孤注一擲，跟隨這本「雞精書」的指示為這場人生考試準備。

三人跟隨指示前往高能市的邊郊，偶然遇到一位以前被淘汰的年輕人阿信，見書上描述的「大師」與其相似便以為他是他們要拜師的對象。盛情難卻下，阿信硬著頭皮幫他們開展這場修養之行。日復一日，與高能市截然不同的生活，有人享受，有人懷疑，因此三人爆發爭吵。

人物小傳

費儕，男，16 歲

父母都是高能市的菁英，自幼已經是很多人眼中「隔離陳師奶的兒子」。

乖巧懂事的資優生；完美主義者。

從一開始就對修煉抱懷疑態度，想回去過循規蹈矩的生活，與其他兩人發生爭執。

小美，女，16 歲

費儕的青梅竹馬；表面上看是個乖乖女，一直以來只是用完美來掩飾自己心裡迷惘的不安；想反叛一次，逃避外界對她的期望。

對公開試沒有信心，誤認為《6uo 修煉手冊》是考試秘笈後參與修煉。

阮攸，女，16 歲

高能市裏典型的「廢青」，是人人都鄙視的平凡人。

害怕面對公開試，害怕要離開高能市，因此在發現《6uo 修煉手冊》時像找到救命稻草一樣。

以前在高能市事事不順遂，但在接觸到與高能市截然不同的生活後，終於令他心情轉好，因此不想歷險這麼快結束，與費儕發生爭執。

人物小傳

阿信，男，25 歲

在 16 歲那年沒能通過公開試，按規定應被驅逐出境，可是卻逃過一劫。

長期沒有與所謂的「高智能人類」接觸，思維模式與三位少年不一樣，也因此

被誤認為是手冊上的大師。

和費儕分享其實生活不必這麼在意結果，要珍惜及享受過程。

| 分場表 | | | |
|-----|-----------|-----------------|--|
| 場 | 景 | 人 | 事 |
| 序 | 虛景 | 費儕、小美、阮攸、 阿信 | 費儕站在舞台中央，周圍傳來高能市的人籍宣傳，交代高能市的教育制度。 |
| 一 | 教員室 | 費儕、小美、阮攸 | 三人在教員室尋找阮攸被沒收的物品，忽然《6uo 修煉手冊》從天而降，眾人以為是公開試的秘笈，決定跟著書中指引展開歷險。 |
| 二 | 郊外 | 費儕、小美、阮攸、 阿信 | 三人去到郊外，嘗試尋找「修煉場」，偶然遇到被高能市淘汰的阿信，以為他是書中所謂的大師，便求他成為自己的師父，好讓他們安然度過公開試。 |
| 三 | 郊外； 信家 | 費儕、小美、阮攸、 阿信 | 三位按著書上指示修煉，阮攸努力訓練著 6uo 技能，而小美也久違地放下生活重擔；費儕卻對這種截然不同的生活抱持懷疑的態度，想回到高能市過回規律、正確的生活。 |

| 分場表 | | | |
|-----|-----------|-----------------|--|
| 場次 | 景 | 人 | 事 |
| 四 | 信家； 郊外 | 費儕、小美、阮攸、 阿信 | 費儕努力勸小美跟他一起回高能市過回「正常」的生活，準備公開試，並策劃留下阮攸一人在這裡，卻不慎被阮攸聽到這番話。費儕勸說小美不成，三人大吵一架。 |
| 五 | 郊外 | 費儕、阿信 | 費儕到河邊冷靜，阿信告訴他其實事情不一定永遠要十全十美才好，要學會珍惜享受過程，且人人都有自己理想的生活方式，並沒有對錯之分。 |
| 六 | 虛景 | 費儕、小美、阮攸、 阿信 | 交代故事最後。 |

序

景：虛景

人：費儕、小美、阮攸、阿信

【燈亮】

△ 費儕 Preset。

VO：歡迎各位光臨高能市，高能市作為香城數一數二培育精英嘅地方，我哋好歡迎各路人才過嚟交流。我哋之所以會有如此驚人嘅成績全賴我哋高能市出色嘅教育方針，喺呢度出世嘅小朋友由細到大都接受住高強度學習。全人教育已經係歷史，我哋高能市已經發展緊「能力教育」，致力於鍛鍊小朋友方方面面嘅能力，令佢哋喺任何情況都可以完美完成使命。

VO：而為左配合我哋呢套咁完美嘅教育方針，我哋特別設立咗 DSE，全稱 Destination Sorting Examination 嘅考試機制，令高能市嘅青少年可以各得其所。

△ 阿信、阮攸出，彷彿探索著什麼。

VO：通過考試嘅芊芊學子就會留嚟高能市繼續接受「能力培育」，而未能通過考試嘅同學都會有去其他城市交流嘅機會。

△ 阮攸、阿信被扯走。

△ 小美出，戰戰兢兢的模樣看著費儕。

VO：喺高能市，人人都有住清晰嘅目標，為成為高智能人類而拼搏努力，亦都係因為咁，高能市已經蟬聯咗「香城完美盃」長達 10 年。

△ 小美決定離開，費儕伸手想挽回。

△ 費儕落寞地留在舞台上看著觀眾。

【燈轉】

VO：咁你仲等咩呢，仲唔快啲入籍高能市？完美嘅生活等緊你嚟開啟。加入高能市，一齊建構完美無瑕嘅生活啦！

【燈滅】

序完

第一場

景：學校教員室

人：費儕、小美、阮攸

【燈亮】

△ SFX：開門聲

△ 阮攸出；躡手躡腳地走入教員室尋找東西

阮攸：（細細聲）喂！你攞下個邊有冇？

△ 小美出。

小美：搵緊啦，你唔好咁大聲啦！驚死冇人知咩！

阮攸：sorry 囉，話時話，阿儕呢，又話嚟幫手嘅，冇義氣——

【燈轉】

△ 費儕出；SFX：燈制聲

阮攸：（阮攸跪下）對唔住阿 sir，你大人有大量，求下你唔好記小人過，再記

多次，我實俾阿媽用藤條 fit 死㗎，求吓你放過我啦？

△ 費儕、小美發出笑聲。

費儕：有冇咁驚啊，好心阮攸你咁細膽就唔好返嚟搵嘢啦！

阮攸：死人費儕，你嚇死我——喂唔係，你熄返盞燈先啦，驚死冇人知我哋喺度咩？

費儕：熄乜鬼啊，依家凌晨幾點啊先生，聽日又係公眾假期，借問聲邊個老師會夜颯颯返嚟改卷呢？

小美：（抬高頭）喺臨搵下你要嘅嘢啦仲講！

費儕：其實你要搵咩啊？唔係因為你話你可以幫我報到 yychan 嘅堂，我先唔返嚟啊，阻住我溫書。

阮攸：其實呢，我呢，上堂俾周 sir 收咗部…eh…部

小美：上天堂部 switch 囉！好心你啦，就嚟考 DSE 㗎啦，上堂玩 switch 玩到周 sir 嗌咗你三次都聽唔到，仲要突然之間大大聲咁爆粗，好難唔沒收你部機㗎。

阮攸：喂，咁我好難得喺五連髮夾彎度一路領先緊，啊，估唔到後面隻 Mario，哇，陰濕到呢，臨衝線嗰下捋咗隻紅龜出嚟，跟住架車一反，咁就比佢爬左頭，跟住…跟住我咪…屌咗出聲囉…

費儕：你都幾勇喎，周 sir 出名嚴你都夠膽上堂打機。唉，快啲搵完，快啲走
啦！

△ 三人繼續在教員室翻來翻去；忽然天色突變、周遭行雷閃電，一本書從天
而降。

【燈轉】

阮攸：哇！嚇死人咩！唔通，呢本嘢，係上天嘅旨意？

費儕：呢本…咩嚟㗎？

小美：咩上天嘅旨意啊？同埋明明今日全日都好天，冇啦啦做咩行雷閃電嘅？

費儕：等陣？點解本嘢會？吓？咩事啊？

△ 阮攸拿起書走到費儕身邊。

阮攸：施主，你唔好咁騰雞先。嚟，神諭啊。

△ 阮攸把書遞給費儕，費儕半推半就，小美靠過來從阮攸手中拿過書。

小美：6uo？係咪咁讀啊？6uo 修煉手冊？唔見啲老師上堂提過嘅？

阮攸：啊！我知啦！一定係 DSE out of syllabus 但又會考嘅能力啦，話唔定係上
天嘅指引啊！媽咪，我得咗啦！我就係嗰個被選中嘅細路啦！

費儕：（驚慌失措）喂！依家有本書喺個天跌落嚟㗎！冇問題㗎咩？Make sense
咩？

△ 阮攸和小美互望一下。

阮攸：哎呀，唔合理咁又點㗎，地球咪又係失驚無神咁爆出嚟。

小美：本書寫嘅內容我哋上堂冇學過，佢好多頁都 Highlight 晒，我估可能有用？

阮攸：噏，小美呢個半學霸都認同我啊，不如（敲一敲書）試下跟住嚟溫呢。

費儕：跟住本嘢？從天而降㗎㗎，跟住嚟溫？

△ 阮攸像黑社會交易般靠近費儕。

阮攸：兩堂 yychan。（看一看費儕）三堂！兄弟份上，陪我哋啦。

小美：阿儕你咁醒，話唔定一兩日已經掌握晒呢本手冊，仲可以教埋我哋添！

費儕：噏，講好三堂，唔準走數。聽日食飯前我有三個鐘，可以犧牲啲時間陪你哋癲嘅。

阮攸：咁聽日放學門口等㗎啦。本書費儕你 keep 啦！我 DSE 考成點睇佢㗎啦。

聽日見！

△ 阮攸拉著小美走，小美把書拋給費儕；阮攸、小美入。

費儕：喂！

△ 費儕原地看了看書便跟上，費儕入。

【燈滅】

小美 VO：點解感覺好似漏咗啲嘢咁嘅？

阮攸 VO：啊頂！我部 switch 啊！

第一場完

第二場

景：郊外

人：費儕、小美、阮攸、阿信

【燈亮】

費儕：喺，如果跟住本書，我哋就到咗佢所謂嘅「修煉場」？

小美：你肯定？呢度？乜都有啲？

費儕：本書真係咁寫㗎，喺「山脊站」落車，D 出口出，行到街口轉左，跟住再轉右，上橋直行，跟住落隧道，上斜路再落山直行，咪呢度囉。

阮攸：俾啲耐性，可能陣間個修煉場會好似米奇妙妙屋咁升出嚟呢！

小美：你真係病得有啲犀利啲，升上嚟？高能市係高能啲，但呢個多咗啦。

費儕：唉，琴晚好地地擺完部 switch 走人咪好囉。喺，一係咁，等多十分鐘，有嘢發生嘅話，我哋就走，好冇？

阮攸：真係唔試下「開心笑、開心玩、米奇…」

小美、費儕：唔試啊！

△ 三人無聊等待，費儕從書包拿出書溫習，阮攸翻閱著《6uo 修煉手冊》。

△ SFX：口哨聲；阿信帶著耳機玩著電話、吹著口哨，向三人方向前行。

△ 阮攸注意到阿信，跟小美說；阮攸以大字型姿態擋住阿信的去向

阮攸：哈！你仲唔係書上面寫嗰個「大師」！

△ 阿信和費儕被阮攸突然的叫喊嚇到

阿信：（把耳機脫下）你同緊我講嘢？

阮攸：乜呢度有第二個人咩？

阿信：你哋認錯人啦，我唔係啲咩大師啊。

小美：係囉，阮攸你係咪認錯咗啊？

阮攸：冇可能，佢嘅衣著打扮同本手冊講嘅大師一模一樣，我冇可能搞錯。

費儕：（拿走阮攸手上的手冊）睇過…呃…又真係…

阮攸：一模一樣呢。

阿信：唔係呢，你哋真係認錯人啦（想走）我有嘢做，唔好意思啊。

小美：你真係唔係「大師」？阿攸就話信唔過啫，阿儕應該唔會睇錯㗎？

阮攸：求下你啊大師，你唔幫我哋嘅話，我哋 DSE 實炒硬㗎！我唔想去香城其

他地方 exchange 啊！求下你救下我啦！

阿信：DSE？Des...Destin...

小美：Destination Sorting Examination。琴晚呢本書從天而降，跟住阮攸就話似係會考嘅隱藏範圍。喺呢，你知唔知咩係 Guo 啊？係咪同數學嘅 formula 有關㗎？

△ 阮攸抱著阿信大腿；阿信示意費儕把手冊給他，翻閱一下。

阮攸：大師，求吓你啦，今鋪我衰咗就有㗎啦，我唔想去紀律市讀毅進啊！

阿信：（苦笑）見你咁咁嘅架勢（奮力掙脫阮攸的拉扯），一時三刻我應該都走唔到㗎啦，（假意答應）不如我哋好地地坐低講好冇，我睇下我會唔會識呢個所謂嘅「大師」？

費儕：哎呀，阿攸你咪阻住人啦，人哋都話佢唔係大師囉。呢度返去市中心冇乜車，就嚟六點㗎啦，我係時候跟 schedule 返屋企食飯㗎啦。

阮攸：人哋都應承咗啦，你咪嘈啦。（推開費儕）好啊好啊，快啲帶我哋去你個度，我哋促膝長談吓！

△ 阿信尷尬地點了下頭，帶著阮攸往前走，阿信、阮攸入；費儕留在原地，小美走向費儕。

小美：試下囉？橫掂你喺我哋入面成績最好，唔使擔心 DSE 考成點，溫少陣應該冇問題嘅。

費儕：阮攸想搏，我明啊，但係點解你都？

小美：咁我成績雖然冇佢咁差，但係都有你咁好，溫多啲冇壞啊？頂盡都係癲

一兩日啫，嚟啦！我睇過本手冊，啲內容好似幾好玩咁！

阮攸（場外）：喂，你兩個行唔行㗎！

小美：嚟啦！

△ 小美向阿信和阮攸方向跑去，小美入。

費儕：如果唔係擔心佢兩個做啲咩犯法嘢，我先唔跟過去。唉，反正 pre-mock

best 5 都有 32，應該唔會衰到要讀 BU 啫！死就死啦！喂，等埋啊！

△ 費儕向三人方向跑去，費儕入。

【燈滅】

△ 阿信、阮攸出。

阿信：（裝作驚訝）嘩！咩嚟㗎？

△ 阿信跑走。

阮攸：大師！等埋我啊！我追唔到你啦！

△ 阮攸拼命追上阿信。阿信、阮攸入。

△ 阿信、阮攸出。

阿信：唉，你唔好跟埋嚟啦！跑 Online 咩？

△ 阿信、阮攸入。

第二場完

第三場

景：郊外；信家

人：費儕、小美、阮攸、阿信

【燈亮】

△ 費儕、小美、阮攸、阿信出

【燈轉】

阿信：唉，你哋坐低先，我斟杯水俾你哋。

費儕：唔該晒。

△ 阮攸好奇地在阿信家參觀，拿起一個模型看。

△ 阮攸：哇，係模型啊！

小美：喂，阮攸，你唔好亂咁搞人哋啲嘢啦！

阮攸：我記得我細個好想要㗎，但係阿媽話砌模型嘅時間，砌完又得個擺字。

依家高能市啲玩具都買少見少，大師！點解你會有呢啲模型嘅？

△ 阿信捧著水進來。

阿信：啲模型好耐之前買㗎。冇計啦，高能市咁講求完美，模型呢啲「無謂」

嘢淘汰咗都唔出奇。

△ 費儕與小美尷尬互望

阿信：啊，係喎，你哋係咪搵緊嗰個咩「大師」話？我睇下會唔會知你哋講緊邊個？

阮攸：咪就係你囉！求下你收我哋為徒啦。

小美：事緣係咁嘅，我哋前日凌晨返學校搵嘢，跟住突然從天而降一本叫《6uo 修煉手冊》嘅書。我哋就懷疑呢本手冊係 DSE 嘅雞精書，咁臨急抱佛腳，就想跟住呢本書嘅指示，考好個試。

阮攸：大師，所以求下你收我哋為徒啦，我哋會好好咁學點做個 6uo 㗎！

阿信：我重申多次，我唔係啲咩大師，不過作為過來人同埋（細細聲）費時俾你哋煩住，我可以幫下你哋嘅。話時話，好似未介紹我係邊個，我叫阿信。

阮攸：我叫阮攸。

小美：我叫小美。

費儕：我係費儕。

阿信：你係咩話？

費儕：我係費儕。

阿信：(呆) 哦，好…好高興認識你哋啊，阮攸、小美、費儕。

阮攸：大師，事不宜遲，你不如開始訓練我哋啦。

△ 阮攸把手冊交到阿信手上；阿信接過，翻閱幾頁。

阿信：嚟啦！

△ 四人圍在沙發上看手冊。

【燈轉】

△ 三人照舊在沙發上看手冊。

△ 費儕走向觀眾。

費儕：就係咁，我哋四個就開展咗呢場唔知終點喺邊嘅修煉。而阿信成為咗我哋三個嘅師父。

【燈轉】

△ 阮攸跟小美拉著阿信在戶外「練功」

費儕：阮攸呢個零禮拜成日拉住阿信「師父、師父」咁叫，有時就捉埋小美跟

住本手冊去「練功」。兩條友最鍾意練嘅呢，就係互相嚟度出招，強身健體啲。

△ 阮攸跟小美互相玩弄著。

費儕：好似咁。

△ 費儕入。

阮攸：睇實啦，我左手、右手，一個慢動作！

小美：師兄你錯手啊！唉，好羞恥啊！（鼓起勇氣）龜波氣功！

阮攸：你打我唔到嘅！

小美：你咪走啊！

△ 小美追著阮攸跑；同時阿信拿著書在家中研讀

【燈轉】

△ 阿信坐在沙發上翻閱手冊。

阿信：雖然我一開始係因為用唔到身所以勉強應承幫佢哋手，但係見到佢哋咁開心，我自己都越嚟越 enjoy 俾佢哋「師父」、「師父」咁嗌。

△ 小美和阮攸衝過來。

【燈轉】

小美：師父！你知唔知本書呢度咩意思啊？

阮攸：喺，我估應該係爛 gag 啲 friend。

△ 小美和阮攸爭論書上內容是什麼意思。

【燈轉】

阿信：佢兩個應該就玩得幾開心嘅。阮攸就一如既往咁嘈嘈閉閉，係個幾得意嘅小朋友嚟嘅。而小美都越嚟越活潑，眼見佢由一開始怕怕羞羞咁，依家就，睇下佢笑得幾開心。至於費儕就…

△ 阿信望向台口。

【燈轉】

△ 費儕出。

費儕：就咁，我哋連續一個禮拜，一放學就過嚟阿信度過住呢種重蹈覆轍，無無聊聊嘅生活。佢兩個應該就幾 enjoy 嘅。我呢，老實講，到依家都係理解唔到本手冊點解會俾佢哋神化到咁。但係見佢兩個咁投入，真係唔知點叫停佢哋…

唯有見步行步…

△ 費儕入。

【燈轉】

△ 阮攸伸了伸懶腰；阿信放下手上手冊。

阿信：其實我一直有條問題想問。

小美：咩啊？

阿信：條問題我想問好耐…其實…點解你叫院友嘅？

阮攸：咩院友啊？阮攸啊！因為（自豪地）我屋企人鐘意洪嘉豪囉！

△ 三人尷尬互望。

【燈滅】

阿信 VO：邊撚個係洪嘉豪啊？Mirror㗎？哦～喺嗰台度「掃、掃、掃」嗰個！

第三場完

第四場

景：郊外；信家

人：費儕、小美、阮攸、阿信

【燈亮】

△ 阮攸和小美背著書包開心連跑帶跳到阿信家門口，費儕在後面緩緩跟著。

阮攸：喂！唔知今日又會學咩呢？

小美：平時上堂淨係學埋晒啲咩公式同埋啲咩《成功學》同埋啲咩《完美人士的自我修養》。我好耐冇試過咁開心咁放縱自己啦！

△ 費儕有點無言；阮攸敲阿信家門，無人應答

阮攸：咦，乜大師唔喺屋企咩？正常佢應該返左嚟㗎？

小美：會唔會係去咗修煉場啊？

阮攸：咁我哋快啲去搵大師啦！

△ 阮攸跑走，小美想跟著但被費儕拉住。

費儕：我有啲嘢想同你講。

小美：咩事啊？唔俾得阮攸知㗎？

費儕：你哋仲諗住跟住本咩咩《6uo 修煉手冊》幾耐啊，你哋跟住阿信就嚟兩個禮拜啦，真係冇問題咩？

小美：咁我哋朝早有 keep 住返學㗎嘛。

費儕：你真係覺得依家嘅生活冇問題嘅？呢度嘅生活又唔跟 schedule，根本就唔符合完美人類基本修養。

小美：我哋呢幾個禮拜嘅生活的確同之前過嗰啲生活好唔一樣。你唔慣呢種生活我都明嘅，畢竟你係我哋三個人面將完美人類呢樣嘢發揮到極致嘅一個人…

費儕：唔係慣唔慣嘅問題，而係呢種生活根本就唔啱！問心，由細到大，我哋都知要做一個完美嘅人先唔會俾呢個社會淘汰。但你睇下你哋日日喺度做緊乜？你哋喺度虛度緊光陰啊！

小美：係啫，但係呢種生活都幾好玩啊，同埋本書可能真係幫到我哋考好啲試呢？咁咪 fit 囉「完美人類嘅自我修養」囉，嚟啦，去修煉場玩啦！

費儕：你明唔明啫！我哋唔可以再咁落去㗎啦！今年考 DSE 㗎啦！一鋪定輸贏，我唔睇結果，仲睇咩啊？係，可能你覺得依家嘅生活好玩，但佢冇用啊！點解仲要錯落去啊！

小美：咁，你想點？

費儕：我知你係個想考好 DSE 嘅人，第時入 U 讀成功學，不如過埋今日我哋唔

好再嚟嘅時間啦！我知阮攸唔會聽㗎啦，我哋忘記呢本手冊，忘記呢段冇用嘅
修煉，好冇？

小美：我唔知啊…我自己都好亂。我係講過想讀成功學，不過我係咪真係鍾意
呢樣嘢，我都唔知啊。我好迷啊！我都唔知自己究竟想點。

費儕：迷？你唔係由細就想做成功人士咩？咩好迷啊？我唔明㗎？

小美：你呢啲由細出色到大嘅精英點會明啫！喺高能市，完美呢樣嘢太基本
啦。唔完美，咪唯有扮囉，扮到好清楚自己想點，但其實我自己都唔知自己想
點。我唔咁做，我身邊嘅人都會對我好失望，覺得我唔配留喺呢度。

△ 費儕想反駁卻又不知講什麼。

小美：我一開始都好唔慣，會質疑本嘢點解同學校學嘅嘢咁唔同。但日子耐
咗，我發現我幾 enjoy 呢種生活。我唔使成日凝住要用「完美」包裝自己。

△ 阮攸出

費儕：即係你想好似阮攸咁繼續癲？

小美：我唔知！但係我淨係知我唔想我哋三個分開。留定走，都要三個一齊！

費儕：（不耐煩）你唔好喺度陪阮攸癲啦！攞自己前途較飛！難聽啲講，阮攸呢
啲「廢青」日日喺度浪費時間我都由得佢啦，但係你唔同，你可以考好 DSE㗎

嘛！你可以扮到好完美㗎嘛！點解要喺度一

阮攸：原來喺你眼中，我係咁㗎。

【燈轉】

費儕：阮攸，我…

阮攸：係，我知，我係廢，我唔係書上面講嗰啲所謂嘅「完美、成功」人士。

但係，我想㗎？

△ 費儕上前想拉住阮攸的手，被阮攸甩開

阮攸：喺高能市出世，我想嘅。我讀書渣，我想嘅。我廢，我想嘅！我擺到明就係會俾高能市拋棄嗰啲「廢青」，但我冇努力過咩？傻嘅去到後期都知呢本修煉手冊流㗎啦，但係我覺得喺度無所事事我好開心啊！

費儕：你咁樣係逃避。

阮攸：你咪由得我避囉！

費儕：你避到幾耐啊？仲有半年 DSE 啦！

阮攸：DSE，DSE，可唔可以唔好再提 DSE 啊！我唔係你呢啲精英啊，我驚啊！你咪由得我逃避囉，我有勇氣面對個考試啊！

費儕：咁呢個世界個規矩係咁，我哋就要遵守。

阮攸：邊個話過個世界嘅規矩就一定㗎？我就一定要遵守嘅！

費儕：咁呢個制度係人類用咗幾萬年制定出嚟嘍嘛，所以我哋就要跟！

阮攸：點解你要逼我面對一個我註定衰嘅結局啊？

△ 費儕欲還擊。

阮攸：夠啦！我唔係你，我點努力都有用啊！因為喺你哋呢啲食物鏈頂端嘅人眼中，我嘅努力係無謂嘅、咁時間嘅。

費儕：我有咁講過。

阮攸：但係你係咁諗。

小美：你兩個唔好咁啦，有嘢慢慢傾啦。

阮攸：小美，雖然我唔知你點諗我，但係多謝呢個幾禮拜你肯陪我癲。唔似某啲人，見死不救。

費儕：你講咩啊！

阮攸：事實囉！既然你覺得個制度逼走我先符合呢個世界嘅運行，咁我就成全你啦！朋友。

△ 阮攸把手上手冊大力扔向費儕然後跑走；阿信趕到

小美：喂，阮攸！

△ 小美無言地看了一眼費儕，便走去追阮攸；費儕看了一眼阿信，撿起手冊撕毀便離去。

【燈滅】

第四場完

JP24《駅》 ©Chu Ka Ying

第五場

景：河邊

人：費儕、阿信、阮攸

【燈亮】

△ 費儕拿起小石頭扔向河；阿信緩緩走到費儕身邊。

費儕：行開啦！你由得我自己一個喺度啦。

△ 阿信想開口卻未組織好自己想說的話。

費儕：走啦！其實我唔明，你又唔係「大師」，點解要搞壇咁嘅嘢出嚟啊？你好得閒咩？我都係想考好個試啫！因為你，依家連朋友都有埋啦！

阿信：我…我唔想你哋俾 DSE 玩殘。

費儕：俾 DSE 玩殘？依家似係你玩我哋多啲啲師兄。

△ 阿信坐在旁邊的一塊石頭。

△ 阮攸入。

阿信：我講個故事你知：以前有個細路經過玩具店嘅時候，成日都會 lur 住佢爸媽買模型俾佢玩，但佢父母就話啦（學長輩腔調）：唔得啊！呢啲無謂嘢冇用㗎！冇意義嘅嘢高智能人類唔做㗎！跟住呢個細路就唯有將佢想要嘅模型一隻

一隻收埋喺佢嘅心入面，繼續扮演佢應份做嘅完美人類。

△ 阮攸出。

費儕：模型…你係嗰個細路？

阿信：你唔係高材生嚟㗎咩？明眼人都知我講緊自己嘅故事啦！我都經歷過 DSE，亦都係呢個能力教育下嘅失敗者。好彩嗰年系統發生故障，冇咗我嘅資料，令我可以繼續好似隻遊魂野鬼咁喺度住。

費儕：故障？冇理由㗎，呢度唔會允許錯誤發生㗎！

阿信：呢個唔係重點。正正因為咁，我有得好似以前咁生活，亦都少咗同你哋呢班「正常人」接觸。慢慢建構咗一套自己嘅生活態度。

費儕：咩態度啊？

△ 費儕坐下

阿信：點解樣樣嘢都要完美啫？唔完美唔會死㗎㗎，對結果、對自己咁執著做咩啫？

費儕：但係結局唔完美真係 ok 咩？成件事如果 end up 冇意義嘅話，一開始點解要嘍力嘍時間去做啊？

阿信：你自己坐喺度內疚都冇意義㗎，符合經濟效益咩？咁你又坐喺度？

費儕：我呢啲叫處理情緒…係…有意義㗎。

阿信：死雞撐飯蓋（站起來）。啱啱放榜嘅我都係好似你咁，想努力搵啲有意義

嘅嘢做，但我發現我越想搵啲有意義嘅嘢做，我就越辛苦。有一日經過玩具

鋪，我見返細個好想要嗰隻模型。我買咗佢返嚟砌。然後就有第二隻、第三

隻，砌砌下就砌咗我想過嘅生活返嚟。

費儕：你想過嘅生活？就係砌模型？

阿信：所以話你真係讀死書。我想過嘅生活就係唔使考慮得失、結局成功與否

嘅生活。我鍾意呢種漫無目的嘅狀態。我知有一日，我坐住嘅呢架列車點都會

去到終站，但我記住嘅應該會係中途睇過嘅風景。

費儕：咩列車啊？你啱啱唔係坐住塊石頭咩？

阿信：（笑）高材生，你自己慢慢參透啦。

費儕：（站起來）我好亂啊，即係點啊？

阿信：即係咁囉！

費儕：咩啊？即係點啊？conclusion 呢？

阿信：嗰世界咁複雜，根本冇可能總結。如果真係要我講嘅話…我覺得同你傾

計幾得意。

△ 費儕站起來；阿信迴避費儕，拿出一直收起來的模型。

費儕：得意？啫係點啊？

△ 阿信：（拿著模型搖晃，假裝是模型在說話）都話 Conclusion 唔係我風格
啊。

△ 阿信向後退，躲避著費儕。

費儕：喂，唔係啊，你咩意思先？

△ 費儕追著阿信。

阿信：你好煩啊。

△ 阿信跑走，阿信出。

費儕：我唔會俾你走㗎！

△ 費儕追著阿信，費儕出。

【燈滅】

阿信 VO：一係你問下觀眾喇，睇下佢哋點樣總結？

第五場完

第六場

景：虛景

人：費儕、小美、阮攸、阿信

【燈亮】

△ 費儕、小美、阿信 preset。

阿信：係咪好想知最後結局係點呢？但其實我都唔知。嗰日佢哋三個散咗 band 之後就有再返過嚟。

【燈轉】

阿信：費儕呢，臨走嗰刻仲 jer 住我，係咁要我俾個總結佢，唔知最後佢總結到未呢？

【燈轉】

阿信：跟住就係…小美！嗰日返屋企撞到佢，佢望到我一眼之後就走咗，唔知佢依家點呢？

【燈轉】

阿信：啊！仲有阮攸呢個小朋友，佢同費儕啖完交我就冇再見過佢啦，不過當我行到屋企門口，發現費儕撕爛咗嗰本手冊唔見咗，可能係呢個小朋友執走咗

啲？

阿信：個故事去到呢度冇啦！係咪有啲失望？覺得差咁啲嘢咁？咪話咗囉，我份人唔鍾意 conclude 啊衰鬼！況且佢哋每個人嘅故事都未完，粗俗啲講：總結條撚咩！喲，等我教精你哋啦，故事吓吓都大團圓結局點會好睇㗎！俾啲新意，直接 0 結局，唔會爛尾，編劇又唔使諗得咁辛苦，係咪啊？

阿信：係喎，醒起編劇叫我打電話俾佢。

△ SFX：手機響；阿信接起手機聽。

阿信：咦，睇嚟佢打嚟先。

△ 阿信接電話。

阿信：原來啱先嗰個係我呀媽，佢話我大姨媽嚟㗎。

△ SFX：手機響；阿信接電話。

阿信：欸，編劇啱啱打電話俾我，話我漏咗一樣好重要嘅嘢未交代喎。就係一

△ 阮攸出，其他人靜止。

阮攸：係咪好想知編劇講咗啲咩？咁就要…

△ 四人會心微笑。

阿信、費儕、小美、阮攸：下回分解啦！

【燈轉】

△ BGM 主題曲

△ 阿信欲離開。

小美：喂，咁快走做咩啊？趕住投胎啊？

費儕：喂，其實會唔會 random 得濟？

小美：係囉？同埋好似冇講過本書點嚟嘅？

阮攸：超！咪講咗囉！世界咪一樣係失驚無神爆出嚟！做人諗咁多做咩啫！

【燈滅】

完